

Supervizor za Brčko uskladio Zakon o sukobu interesa i Izborni zakon Brčko Distrikta sa zakonima na državnom nivou i izvršio reorganizaciju Kancelarije koordinatora Brčko Distrikta u Vijeću ministara Bosne i Hercegovine



Supervizor za Brčko dr Raffi Gregorian izdao je danas Naloge supervizora kojima se donose Zakon o sukobu interesa u institucijama Brčko Distrikta i izmjene i dopune Izbornog zakona Brčko Distrikta. U drugom nalogu supervizora, on je donio izmjene i dopune Zakona o javnoj upravi Brčko Distrikta kojima se vrši reorganizacija Kancelarije koordinatora Brčko Distrikta u Vijeću ministara Bosne i Hercegovine.

U julu ove godine, Parlamentarna skupština BiH je usvojila izmjene i dopune Zakona o sukobu interesa u institucijama vlasti Bosne i Hercegovine. Vlada i Skupština Brčko Distrikta još uvijek nisu uskladile zakon Distrikta sa zakonom na državnom nivou. Odredbe ovog zakona se odnose na novoizabrane zvaničnike i nosioce izvršnih funkcija, koji bi stoga trebalo da budu upoznati sa njima čim Centralna izborna komisija objavi konačne izborne rezultate.

U tom kontekstu, takođe je potrebno dodatno uskladiti Izborni zakon Brčko Distrikta sa Izbornim zakonom Bosne i Hercegovine kako bi se izbjeglo svako pogrešno tumačenje nadležnosti koje

pripadaju Centralnoj izbornoj komisiji i Izornoj komisiji Brčko Distrikta.

Treće, iskustva stečena radom Kancelarije koordinatora Brčko Distrikta u Vijeću ministara u protekle dvije godine, ukazuju na to da bi Kancelarija imala koristiti od određenih izmjena u njenoj strukturi i opisu poslova i efikasnije obavljala svoje dužnosti koje se sastoje u zastupanju interesa Brčko Distrikta u institucijama Bosne i Hercegovine. Kako bi to bilo urađeno, potrebno je unijeti neke tehničke izmjene u Zakon o javnoj upravi Distrikta.

Pošto je redovan mandat prethodne Skupštine Distrikta istekao, a nova Skupština još nije uspostavljena, nije ostalo vremena da Skupština usvoji ove izmjene u redovnom postupku. Stoga, nakon što se konsultovao sa svim predstavnicima političkih partija u Brčkom i Centralnom izbornom komisijom Bosne i Hercegovine, supervizor je odlučio da donese izmjene i dopune putem naloga supervizora.